

# CUSSEGL GROND

Sessiun d'october 2023

## **Dumonda da la fracziun da l'Allianza dal Center concernent ils custs da sanadad creschents (emprima sutsegnadra Ulber)**

Il schoc da las premias ha anc adina in ferm effect – gist tar las famiglias: Sin plaun naziunal vegnan las premias da las cassas da malsauns auzadas en media per 8,7 pertschient. Correspudentamain èn ils custs da sanadad resp. las premias da las cassas da malsauns in dals pli gronds quitads da la populaziun svizra. Cun in augment d'en media 8,3 pertschient èn il chantun Grischun e las personas assicuradas en il chantun Grischun bain pertutgads in zic pli pauc, però anc adina detg avunda. A medem temp èn las vischnancas confrontadas cun custs supplementars e cun surpigliadas da deficits en adina dapli ospitals. Quels custs e las surpigliadas da deficits engrevgeschan ils preventivs da l'onn proxim. Tut tenor vegliadetgna è l'augment da las premias da las cassas da malsauns different. Oravant tut ils giuvenils en la vegliadetgna da 19 fin 25 onns engrevgescha l'augment spezialmain ferm. En media vegnan lur premias auzadas per 8,8 pertschient, da 232.60 francs sin 253.10 francs. Per ina famiglia da quatter personas signifitga quai ina grevizza supplementara da 54.60 francs per mais. Independentamain da quai han gist ils giuvenils e las famiglias gia da cumbatter cun custs da viver creschents – en connex cun la cassa da malsauns, cun ils pretschs d'energia (electricitad, benzin e.u.v.) e cun las victualias. Il chantun Grischun vegn supplitgà urgentamain da prender mesiras per distgargiar la populaziun, senza che las prestaziuns dal provediment da sanadad decentral vegnian messas en dumonda. En quest connex è l'augment da la reducziun individuala da las premias mo ina mesira pussaivla, che vegn gia preparada sin plaun federal. La funtauna dal problem dals custs da sanadad creschents na vegn cun questa mesira dentant betg prendida per mauns. Autras pussaivladads ston vegnir eruidas.

Sut quest aspect sa drizzan las sutsegnadras ed ils sutsegnaders a la Regenza cun las suandantas dumondas:

1. È la Regenza da la medema opiniun sco las sutsegnadras ed ils sutsegnaders, che las premias da las cassas da malsauns che vegnan augmentadas considerablamain, èn ina grevizza fitg gronda per la populaziun grischuna?
2. Ord vista da la Regenza: Tge mesiras a curta vista èn pussaivlas – ultra da l'augment da la reducziun individuala da las premias – per far frunt al schoc da las premias che la populaziun grischuna subescha?
3. Tge mesiras a media ed a lunga vista planisescha la Regenza per survegnir sut controlla ils custs da sanadad resp. las premias da las cassas da malsauns che creschan fermamain?

Cuira, ils 18 d'october 2023

**Ulber**, Epp, Mani, Beeli, Bergamin, Berther, Bettinaglio, Binkert, Brunold, Collenberg, Crameri, Danuser (Czas), Derungs, Epp, Föhn, Furger, Gansner, Geisseler, Heini, Kohler, Lamprecht, Loepfe, Maissen, Messmer-Blumer, Michael (Donat), Quinter, Righetti, Said Bucher, Schneider, Spagnolatti, Tomaschett, Widmer, Zanetti (Sent)